

嘉慶新修江寧府志

新修江寧府志卷之三十四

人物志 儒林

郡志通乎史例人物之志史之傳也然江敞陳畱人物志陽休之幽州人物志志傳之通稱久矣江寧賢哲於海內爲盛今列之爲十類曰儒林曰敦行曰忠義曰仕績曰文苑曰隱逸曰流寓曰技藝曰列女曰僊釋史家之傳取舍嚴矣若郡志則通乎鄉曲之情有不能盡如史例者矣善善從長之義也作人物志

自晉南渡江中原士大夫從遷江表僑置其本郡琅邪一郡實在今江寧之地然琅邪之王多居會稽吳中此

地雖有烏衣馬糞之宅乃仕於京師所居耳不可定爲  
此間人也惟琅邪顏氏累世皆葬於幕府山見顏魯公  
家廟碑文是生居死葬不出此土其名賢宜入此志矣  
若夫中原他郡大族過江者數百年不復故土苟其僑  
住丹陽以劉知幾史通之論及當時土斷之法衡之正  
當作丹陽人耳然當時大族恥儕南士不肯從土斷之  
制而今古隔絕亦不知僑居果在何所舊江寧志或載  
六朝名賢數人推其義例良爲無據然今亦不能決其  
非居此地人也舊志所有今姑依列之其所未收不復  
廣采焉

吳唐固字子正丹陽人修身積學稱爲儒者陸遜張溫  
駱統皆拜之黃武四年爲尙書僕射事附吳志闕澤傳  
唐許叔牙潤州句容人少精於毛詩禮記尤善諷詠嘗  
撰毛詩纂義十卷事詳舊新兩唐書儒學傳

元張璠字達善其先蜀之導江人蜀亡僑寓江左受業  
金華王柏得朱子三傳之學學者稱導江先生著有四  
經歸極等書事詳元史儒學傳

明陳遇字仲行高祖義甫自曹徙居建業遇天姿純粹  
篤學博覽學者稱爲靜誠先生事詳明史本傳

金潤字伯玉上元人年十二能賦詩及長才敏有識正

統間以舉人授兵部司務有言赤金蒙古所產欲取之  
以資戎器潤曰豈可使敵人知此議遂寢瓦刺入寇英  
宗欲親征潤以兵事未可遽煩車駕力上疏不報土木  
之變陳策於尙書于謙請堅壁清野以待之謙從其言  
軍國大計每與諮議京師晏然擢南安知府以子貴乞  
休潤有文章尤邃於易嘗畫圖系解著淵學探微十二  
卷

沈鍾字仲律上元人爲諸生時宿學舍閉戶讀書繻袍  
自樂成進士居父憂居廬三年未嘗言笑服闋授吏部  
主事以母在疏乞就養改南吏部侍郎章綸嘗入賀京

師欲委之同列鍾曰臣子事君可委事於人乎綸揖謝其所友惟章懋羅彝等時稱十君子尋拜按察僉事考績擢副使督學湖廣時座主尹旻秉政當候見鍾問其所居李賢顧坐客曰今之不識相門者仲律一人耳改督學山東以子爲楚府儀賓遂致仕歸家無所棲息毫不介意年八十卒

金賢字士希江寧人偉幹修髯顧盼偉如舉宏治十五年進士授給事中正德初奉命勘兩淮重獄時劉瑾亂政諸司讞獄非取其意旨不敢決賢操三尺不少徇瑾恨之出爲大名知府有政聲卒中忌徙延平是時武宗

好巡幸轍跡所至民不得寧賢乃請老不俟報而歸賢精於春秋嘗以所自得爲紀愚十篇或問百篇行世

景暘字伯時上元人年數歲隨其父官廣州劉大夏見其文而異之曰此子方爲國器正德戊辰舉進士第二除翰林院編修是時劉瑾亂政陵轢朝士見者屏氣暘獨不之阿每當進講必越宿齋戒冀有感悟在館職九年遷國子司業以資當進侍讀梁儲曰成均士子師範非君不可因奏畱之六館諸生人人以爲得師改左中允管南京國子司業事南方士習競便利有請囑者一切謝絕士習稍正後以母憂去位起復方就道染疾而

卒

李登字士龍上元人弱冠入京學以文行著時督學耿定向倡明理學擇諸生之俊秀者尊異之以風多士登居其一焉隆慶初以選貢充國子監生授新野令條陳興革俱切時宜民受其利以抗直忤時改崇仁教諭講明鄒魯之學有願學編寶唐語錄去官歸家居三十餘年惟以明學爲務學者稱如真先生卒年八十六登孝友出天性事父及兩繼母養生送死不愧古人視子姪無異情有產俱中分之精考六書之學直探其奧所著字學諸書行於世



賈必選字徒南上元人萬歷己酉舉人官戶部主事筦西新倉時巨璫總理兩部復遣其黨分伺六倉必選盡黜陋規無所染璫爲稍斂會同官倪篤之以屯豆下獄必選知其冤據事陳辨謫九江幕俄遷桂林司理旣而篤之事得白起用必選亦陞南工部虞衡司未任丁父艱歸卽杜門不出以講學著書爲務晚年失明取架上諸書令友若孫讀之必選凭几諦聽爲辨析折衷口授筆錄成帙至午夜不休曰非是不樂也卒年八十七所著松蔭堂學易行世

莊昶字孔暘江浦人持身慕伊川矩度接人慕明道和

氣學者稱定山先生事詳明史本傳

劉閔字子賢六合人家貧力養母或恚怒則衣冠跪牀下以父喪未葬三年斷酒肉不內寢朔望輒號於殯所鄰族憐之爲助其葬妻失愛於母出之終身不復娶當事薦其學行詔授本學訓導著有家禮考昭穆圖宗子說五倫啟蒙諸書

國朝張怡一名遺初名鹿徵字瑤星上元人父可大明季登萊總兵官會袁崇煥殺皮島帥毛文龍其將士乘機爲變可大死之事聞怡以諸生蔭錦衣衛千戶崇禎十七年李自成陷京師脅之使降怡不屈賊怒械繫將肆

掠其黨或義而釋之明叅怡遁歸故里其妻已前死獨身寄攝山僧舍足不入城市鄉人稱曰白雲先生當是時勝國遺士多知立名義以不降志爲高其賢者躬耕窮鄉士大夫不能見其面然尙有文字流傳人間怡則躬樵汲口不言文章雖日著書密不示人四方冠蓋日往來於茲山而不知山中有是人也康熙三十四年怡年八十八以壽終其親故夙市良材爲具棺槨怡時已病革聞之泣曰昔先皇帝崩不成喪先將軍致命海島無人視含斂吾受茲忍乎顧謂從孫某趨易之乃卒乾隆三年

詔修三禮學官集諸生繕寫怡書欲以進久之未就其後

朝廷開四庫館江蘇撫臣乃采所著三禮合纂以進焉他所著書尚二十餘種詳藝文志

方苞字靈臯一字鳳九安徽桐城人遷居上元少與兄舟弟林相友愛康熙時舉進士以戴名世南山集案下獄論死已而赦之隸旗籍以白衣入直

禁廷

世宗皇帝卽位首

詔出旗未幾遂用爲中允再遷侍讀學士刑部侍郎孫嘉淦被劾下獄苞謂大學士鄂爾泰曰孫侍郎以非罪死公復

何顏坐中書於是嘉淦遂得免尋遷內閣學士

高宗皇帝初卽位議行三年之喪苞因欲復古人以次變除之制禮部尙書魏廷珍上其議會大臣有不便者事遂格不行遷禮部侍郎河督高某夙與苞善旣而違衆議開毛城鋪臺省二臣有疏言其不便者坐下獄苞見徐元夢令爲

上言不當以言罪諫官

上卽日出之禮部共議薦一貲郎入曹和碩履親王涖部已許之矣苞以故事禮部必用甲科不冝平署其抗直如此坐事罷官後

特賜侍講銜歸里乾隆十四年八月卒年八十二苞爲人孝友敦厚其論學一以宋儒爲宗嘗謂其友蠡李堪曰程朱之心與天合傷程朱是謂戕天地之心也其說經之書大抵推行宋儒之學而名物訓詁皆所略云少與兄舟俱以時文名天下其古文自謂宗太史公義法而不喜班固柳宗元晚年自號望谿學者稱望谿先生

翁荃字蘭友一字止園江寧人入學後不事科舉入雲臺山鑽研經訓山有虎害出貲募獵戶除之督僮奴徧野檢白骨收葬乾隆初

詔修三禮徵窮經之士公卿交薦荃固辭以弟子和風翔應聘

晚更卜築南郊五經三禮皆有纂說古文詩歌成集藏於家

程廷祚初名默字啟生上元人自少穎異嗜學爲諸生累不得舉雍正十三年開博學鴻詞科安徽巡撫王紘以廷祚應

詔乾隆元年至京師有要人慕其名欲招至門下屬密友達其意曰主我翰林可得也廷祚正色拒之卒不往遂不得用歸江寧十四年

詔舉經明行修之士廷祚應薦入京師復報罷三十二年病作年七十七廷祚於學入之頗深其大要在以博文約禮

爲進德修業之功以克己治人爲格物致知之要其於諸經各有論述而尤邃於易注釋尤多晚年自稱青谿居士其別號綿莊學者稱綿莊先生

戴祖啟字敬咸上元人乾隆壬午中舉人四會試不第會京師開四庫全書之館大學士于敏中爲總裁屬其同姓震召祖啟祖啟不往見乘舫歸戊戌成進士掌教關中書院己亥陝西巡撫畢沅薦其品學

召見試四書文一通以國子監學正用拜

命旋歸三歲卒祖啟少工文詞旣乃潛心經學注尙書春秋多所發明其在陝西教導有法數十年後陝人猶感思之



子衍善字元嘉有學行著有語孟徵

新修江寧府志卷之三十五

人物二 敦行一

漢防廣棠邑人爲父報讐繫獄聞母死哭泣不食邑令  
鍾離意聽廣歸家殞歛歛畢還就獄事聞竟以減死論  
事載後漢書鍾離意傳按傳意遷棠邑令章懷注堂邑  
故域在今博州堂邑西北按唐博州堂邑乃東漢時東  
郡清發干兩縣地東漢廣陵自有堂  
邑縣然則章懷注非舊志載此是也

晉顏含字宏都臨沂人少有操行以孝聞從元帝渡江  
仕至光祿勳遜位就加光祿大夫

詳晉書孝友本傳

宋陶季直秣陵人祖愍祖宋廣州刺史嘗以四畝銀置  
前令諸孫各取其一季直年四歲獨不取曰若有賜當

先父伯不應度及諸孫故不取愍祖奇之五歲喪母哀  
若成人聞者莫不酸感仕齊至建安太守梁臺建爲黃  
門侍郎辭還鄉里

詳南史孝義本傳

齊陶子鏘字海育秣陵人兄尚宋末爲倖臣所怨被繫  
子鏘公私緣訴流血稽顙兄乃得釋居母喪時與范雲  
隣雲每聞其哭聲必動容改色母素嗜蓴恒以供奠會  
梁武義師至營蓴不得慟哭而絕久之乃蘇遂長斷蓴

味

詳南史孝義本傳

朱年秣陵人母死廬墓終身有白兔紫芝之異鄉人名

其里曰孝感至今有朱年隴

見景定志

梁江紉字含潔考城人居金陵父病目紉侍疾經年夜  
夢一僧告以飲慧眼水乃可差及覺啓捨牛屯里舍爲  
武帝命以慧眼爲名及就創造泄故井井水清冽取以  
洗眼因此遂差及父沒紉竟以毀卒

詳梁書本傳按考城江氏南渡爲盛

族齊武帝所謂求爲士大夫由江敷謝淪者也紉乃淪  
孫舊志獨采紉入江寧不知何據姑存之若陽夏謝氏  
世居會稽明應天府志載  
謝蘭謝貞良爲舛誤今刪

庾道愍潁川鄆陵人襁褓所生母流漂交州長負擔冒  
險求得之族孫沙彌嫡母劉氏亡水漿不入口累日晝  
夜號慟隣人不忍聞所坐薦淚霑爲爛墓在新林忽生  
蒼松百株後在會稽復丁所生憂還都濟浙江中流遇

風舟將覆沙彌抱柩號哭俄而風靜沙彌子持亦性至

孝居喪過禮

三人俱詳南史本傳

徐雄秣陵人位奉朝請母終毀瘠俄而兄亾扶杖臨喪一慟而絕

司馬嵩年十二丁內艱哀慕過禮父喻之令進粥然猶毀瘠後丁父艱哀毀愈甚廬於墓側日進薄麥粥一升墓在新林連接山阜舊多猛獸結廬數載豺狼絕迹常有兩鳩棲宿廬所馴狎異常

詳南史孝義本傳

唐張常洵句容人建中四年親沒廬墓墓側生芝草十

莖從孫公挺亦以孝聞

景定志

宋包級父鑲爲人所殺級年十七與弟綉扶讐雙目瀝血祭父讐家訟之官義而直焉

張孝友句容人讀書不仕親沒廬墓六年嘗有五色鳥來集墓樹

伊小乙與劉興祖俱溧水人割股被旌

夏某逸其名事母至孝淳熙間旌其里曰昭孝  
謝千九溧水人割股療父疾

陳某逸其名與鄭雲龍溧水人俱割股療母疾

趙煥字仲章溧水人以該洽聞授儒學教諭父卒廬墓終身不復任

嚴晃溧水進士幼以孝聞元兵渡江晃負母避之道遇  
兵欲刃其母晃以身蔽爲兵所傷幾斃草廬吳澄嘗哀  
以詩

劉應庚高淳人德祐丙子元兵南下應庚以母臥病二  
姪甫離襁褓語妻周氏曰我衛母汝保二孤猝有兵入  
周氏自殺隨傷其母背應庚急以身翼之已被數創泣  
請曰幸畱我四人財物可盡取也衆哀而舍之尋奉母  
抗姪避窟中復遇兵曳出之應庚請如前兵義之與以  
牛酒金創藥而去迨母亡居喪哀毀孫璫邑諸生廬墓  
六年感環百鳥今名孝子岡

元傅霖江寧人母死居喪晝夜哀慟葬後廬墓被旌  
王子清家金陵事母盡孝人無間言

樊淵字德翁句容人至元中奉母避兵茅山猝至欲殺  
其母淵抱哭求代死兵兩釋之母亡終身不離墳墓  
顧童子建康人割股愈母而已死

明周琬江寧人父爲滁州知州洪武時坐事論死琬年  
十六叩闕請代上疑爲人所教命斬之琬顏色自若乃  
宥其父戍邊琬復請曰戍與斬均死耳父死子安用生  
爲上怒命縛至市琬色喜上察其誠赦之親署屏曰周  
琬孝子尋授兵科給事中

明史



姚金玉其先浙人洪武初取實京師隸上元性至孝母病割股以進獲愈有司聞於朝詔旌爲孝行之門復其家

徐佛保南京人事母丁氏以孝聞丁患痢佛保剖腹割肝以進母疾瘳詔旌其孝

張福緣上元人母疾衣不解帶者累月病轉劇割股作羹進之果愈洪武二十七年旌表

上元徐鎮童李某女龍江衛丁歪頭洪武時俱以孝旌張頤高淳人父讓洪武二十九年坐法頤擊登聞鼓願代天子嘉其孝減戍南京石城門千戶所

陳啓方六合人指揮同知晟之子以請襲謫戍大寧值兵亂與妻盧氏謀奉母棄子出奔母獲免永樂初授忠義左指揮同知學士李時勉誌其墓

馮天孫上元人家貧有孝行母疾割股作羹以進永樂間被旌

明史

劉銓江浦人御史觀之子永樂年觀坐事當辟銓擊登聞鼓願以身代蒙特宥復觀職

楊佐上元人甫成童母病劇剖腹取肝和粥以進母獲愈後三日佐卒祭酒程松溪聞而異之殯之日令太學生數百人送其喪

黃童子名潤江寧人永樂中徙江南富民實北京潤年纔十二詣官請代父行官不許潤曰父去日益老兒去日益長官悅而從之

浦阿住沈得安嚴分保俱江寧人馮添孫邵佛定俱上元人永樂時以孝旌

千戶劉潮子文縉割股愈潮縉疾子天命亦割股療之天命妻宋氏疾女桂姐又割股痊母

王海江浦人親亡廬墓疏食三年又有湯學家貧事親盡孝

徐昱字彥昭江寧人父病革醫告技殫昱日夕籲天求

以身代割臂肉和糜以進父疾瘳鄉人將以聞部使者  
昱曰此一時遑迫之計無復之耳奈何從邑長令干名  
乎後舉宣德七年鄉試爲國子助教居官有矩範大學  
士劉定之祭酒吳節器重之

顧夢采上元人與同邑庠生沈昇庠生陸元龍吳淦王  
頊以割股療親被旌

張繼宗江寧人宣德間以孝旌

李景星字應德上元諸生幼有至性居父母喪三日不  
一飲食葬祭悉用朱氏禮里人推其孝行

龍景華字宇春上元人少孤奉母孝嘗侍疾割股以進

者再嘗糞覺其味苦喜謂妻徐氏曰母必安矣徐亦能  
順姑志勤織紉以孝養鄰火熟所居景華額天曰吾母  
老幸畱此室以安養之須臾風返火滅天順己卯有司  
以聞詔旌其門曰孝行永復其家母歿廬於墓側朝夕  
號慟有盜十餘人過於墓所聞哭聲曰此孝子相戒無

犯

案明史及省志以爲姓龐當從明史

蕭春字秉常家金陵父病荆春祈求備至及疾革臭穢  
狼藉春泣曰吾父不復生矣兩手據牀一吸殆盡悲苦  
氣絕良久乃甦父歿廬墓

陳謨第名世上元人父病篤各額天願以身代相繼割

股而進父尋愈先是其母朱氏曾割股愈其父姊適劉  
又割股愈其母孝行相承亦罕觀云

丁禱其先江都人祖瑄天順初爲錦衣帥沒而賜葬江  
寧石子岡遂家焉禱襲府軍後衛指揮使性至孝年五  
十猶無子歲時伏臘必走賜塋下具牲牲申誠悃風雨  
寒暑未嘗愆期一日冒雪而往拜謁竟時屆隆冬瞻視  
壠上槭樹結一碩果大如拳異而攜歸與室人啖之遂  
有娠生子宏潮得世襲迄今子姓蕃衍

翟鳳鳴溧水諸生父姚州吏目卒於任所鳳鳴徒步悲  
號迎柩還

金玉畱守右衛籍弱冠爲父報讐郎中尹灝稱其孝

毛程字公度六合諸生父卒廬墓三年有鵲來棲塋朝夕悲鳴與程哀慟之聲相間服闋鵲亦飛去人咸異之陳敦化秣陵人母老臥病土寇爲亂化獨守母不去寇劈門入執化索賄繫於樹連射之備受楚毒惟以身蔽母未幾所傷竟痊咸謂孝誠所致

花犇孝子高淳人不知姓名日負薪以市嘗雪中至學宮教諭于鳳見其衣敝肘露曰何不以薪價易衣對曰小人有母不暇自謀也鳳曰汝有妻乎曰有何以衣妻曰新者奉母而易其舊者聊蔽體耳鳳喜其孝贈以衣

錢不受固與之乃曰當爲公供薪鳳堅辭之至夜則載薪投學舍園中鳳踪跡之竟不得或曰居花犇故名

胡琛六合諸生親亾廬墓天順時以孝旌表

顧暘江寧人正統時以孝旌表

明史

盧雍字廷佐江寧人天順間進士由武庫司主事累官湖廣左布政使皆有政績居父喪廬於墓側有產芝之異隆慶間詔旌其門

謝芳字景昌上元人景泰丁丑進士授南京兵部主事歷郎中出知永州府有孝行

戎憲字廷相句容人幼喪母事父至孝景泰乙亥夏六



月暑雨不止父病篤憲倉皇失措割左股和藥進疾竟愈

徐欽字承之句容人成化丙午舉人母亾廬墓

丁潞溧水人成化時諸生母亾廬墓側邑令王弼聞狀三過慰之將聞其事潞堅辭之而止

張諫字孟弼句容人孝事二親由進士筮仕行人司丁母憂廬墓三年羣鳥集於壟樹服闋進監察御史奉敕歸省父病躬湯藥比沒復廬墓三年朝夕悲慟芝產墓旁成化時召爲順天府尹以忤時貴出守萊州政聲大著召爲太僕少卿

陳標江浦人年五歲生母李氏爲父所遣改適於浙長  
欲尋求以父老不果父亾詣浙迎母沒已十餘年遍訪  
遺塚啓棺滴血負以歸葬

梅洪溧水人少孤事母孝進以甘旨自奉甚約其婦有  
後言遣之母瞽洪負以行一旦復明人以爲異母卒廬  
墓三年縣令聞而賢之爲娶妻生子矣婦厭其貧去之  
數歲子卒洪亦卒邑人收葬城北十里許有監司題曰  
孝子梅洪墓

吳瑄字元玉上元人性至孝親病躬侍湯藥及卒哀毀  
逾禮墓側產芝登成化己丑進士仕至工部郎中

王昌江寧人事親盡孝色養靡間母患頭風仆地傷且死昌籲天求以身代叩頭流血血涔涔濕衣裾間母疾尋愈子頊善繼父志母得奇疾割股以進人以世德稱之

孫文達高淳人性孝友家與李某鄰李心計其產父周六力拒之李中以陰禍官捕逮之文達曰父老矣兄任家政諸弟俱幼吾其行乎孑然就械比對簿竟斃杖下錢浩翁句容人幼孤事母色養有妹失於亂軍母痛念不置浩翁遍訪得諸萊州攜妹省母時母年八十有三喜甚鄰里皆賀又十年母沒浩翁年七十終喪不御酒

肉不脫巾經

蔣繼蕃字巽之上元人舉正德己卯賢書性至孝再上春官抵淮忽心動急歸則母已病篤一見而逝人以爲孝感云

曹鎮六合人里中火起延及其門鎮躬護父柩俄而風返火滅

王萬禕字日華江寧人割股愈親疾

趙永行高淳人年十二父君朝被誣繫獄當辟永行大慟族某憐其孝攜之叩恤刑路過徽遇雨溪水暴漲漂流數十里不死詞上寃雪時人異之

唐保八句容人幼喪母力耕以養繼母朱氏得父歡父歿事繼母益盡孝值歲歉負米供母與其妻子啖草實子纔二歲朱減食哺之保八慮不能兼濟棄子池中妻救之得存後因力耕獲窖錢二斗舉家賴以全活人比之郭巨云

谷蒞高淳人善事父母患瘋痺恐貽親憂詭言已愈嘗夜跪而問寢足蹶傷指血流滿地父母知其未愈也相持痛哭疾亦漸痊居母憂盡哀兩事繼母如所生父沒尤悲慟里人不忍聞

趙時振字少東江寧人舉戊子鄉試授嘉祥教諭母亡

哀毀逾禮扶柩葬於康家山廬墓三年竟以疾死後人立碣山中曰趙少東先生廬墓處

鄭濂字師周江寧人嘉靖癸未進士爲行人兩使藩封餽遺一無所受授山東道御史按兩浙湖廣有能名以父憂歸乞致仕養母盡孝設榻於側旦夕候問起居惟謹長跼進甘旨母亾濂已老哀毀終喪里人著純孝傳以稱之

史元八高淳人事母徐氏謹色養靡懈母病割股和藥

進比卒廬墓嘉靖間被旌

案舊志作員八省志作負八

虞周溧水諸生割股愈母

姚珉字廷器江寧人父遊越中得疾劇珉適往侍湯藥未浹旬疾愈人謂孝誠所感

楊師祿字承佑高淳人遇亂兵父被執師祿號泣請代兵異之欲畱置軍中不從被害妻卞氏年二十守遺腹子以終

周什一溧水人少孤家綦貧事母孝負販以養母病思食魚脂會大風漁人罷釣什一遍覓諸湖濱得一鮎倍價市歸剖之得黃金百兩家用以饒孝養不匱

姚澍字元白上元人弱冠入太學性至孝母病脾醫不能療乃割股作羹以進病漸愈嘗拾遺金一囊候其主

不至盡以周貧乏謁選得鴻臚尋告歸侍養勿怠

張可度字屬筏江寧人侍母於兄可大官舍可大旣殉難賊騎充斥有勸可度逃者面叱之間關護其母及兄喪以歸

黃英字奇中溧水人事親色養割股者再廬墓六年被旌

余彥字仲茅江寧人萬歷間進士甫登第乞終養奉母十有六年後官光祿少卿

魏孝楞高淳人親沒廬墓楞沒子希臯亦然萬歷時敕旌父子雙孝



湯之尹高淳人萬歷間入太學會應鄉試忽夢父病篤驚寤而歸省夜過蒲塘墮水居人聞空中語曰河溺孝子速往救尚可活十二年衆奔救得不死昇歸父果病痢劇累割股進勿愈之尹語第願減已算延父壽十載夜則向天哭禱達旦父竟痊比二年而之尹卒邑令上其事表之曰純孝格天

許應時六合人家貧事父堅以孝聞父壽踰九十應時亦六十餘白髮承歡鄉里稱羨

章憲文溧水人父爲南昌通判憲文穉年喪母事繼母至孝父病額天默禱竟痊

趙拱辰江寧諸生純孝性成居家教授承歡備至有重幣聘之遠遊者曰吾方以身事親豈以千金易一日耶子自明孫司至皆以孝稱鄉人表其里曰仁孝里

陳希任高淳人家貧事親至孝值歲歉鬻子以供甘脆父病衣不解帶號天割股以進父尋愈居喪哀毀骨立萬歷間旌其孝

章有道字天培江寧人京衛指揮事繼母韋氏盡孝躬侍母病延太醫鬻產易藥母亾哭泣踰禮士林咸稱之吳世榮高淳人父沒廬墓三年母亾亦如之萬歷間以孝旌

蕭泮溧水人父賓外賈久不歸號泣辭母踪跡數年不得染病而反事母益孝

李長標句容人文定公會孫性至孝母危疾藥物罕效割左臂肉以進竟不起踴踊呼號勺水不入口尋以毀歿

張一鵬字舉之句容貢士飭躬修行以剛方廉潔自矢天性純孝父病焚香祝天割左臂肉爲羹以進父食之甘果愈邑中咸以孝稱

劉廷說字衷全上元人母蔡氏年踰六十得劇病醫治罔效乃籲天割股進之遂痊天啓間被旌

葛至學宋文定公邲裔孫高淳人性至孝爲父割股者  
再母瞽舐之復明居喪廬墓夢中猶爲孺子泣哀毀動  
里閭事聞天啓間被旌

馬遇伯字際明上元人篤孝二親色養惟謹天啓中仕  
豹韜衛指揮掌衛繆大樸索其家珍玩遇伯以親所受  
不肯與遂誣劾罷官偕妻田氏躬耕養親隱遯終身  
施龍高淳人割股愈親伏棺滅火廬墓盡哀有司上其  
事被旌

阮鳴韶上元人年十三補博士弟子父垕以劾嚴嵩罷  
官韶承父志不應鄉舉父母壽俱九十餘亾韶居喪已

逾七十擗踊號泣聞於閭巷廬墓三年如禮江東有老萊子之稱至八十七而終門人私謚曰端穆先生

余待舉江浦諸生甫二歲而父母歿依祖父母以成立比長以純孝聞祖父母疾顰天願以身代居喪盡哀崇正間節使上其事被旌時有諸生趙國璧者早喪父事母孝亦被旌

殷之禮字仍夏京衛指揮樸實不文父國光賁表北上卒於徐之旅舍禮年十二奔喪千里迎柩歸葬孀母李氏衰老備極甘旨奉養娶馬氏以母病不入內寢日奉湯藥夜煮梨棗撫摩母側妻亦善事姑里人以雙孝稱

之

任超溧水人父病危超額天割股調劑未進而父愈人謂天哀孝子云

張正毓字伯和高淳諸生事親循禮經父沒水漿不入口者七日哀毀踰禮鼻眼皆出血及小祥扶杖骨立嘔血而卒

魏臞高淳諸生早喪父母葬於寧陽距家六百里臞痛墓離鄉井不忍舍去廬於墓者數十年

李夢周六合人年七歲父疾割左股以進而愈又有陳應登者割左臂療父割右臂療母

周庖高淳人少孤事母孝疾則割股以愈歿則廬墓盡  
哀又有鄉貢邢振羽親亾廬墓六載孔應紀五歲喪父  
哀慟幾絕九歲母疾割股療之

趙鳴臯字聞野溧水人幼喪父母事繼母至孝卽累斤  
而色養靡間母亦爲之感化

楊振新溧水諸生與袁文化俱以父死廬墓

王潢字元倬江寧人孝友能文章舉崇正丙子鄉試親  
老不仕賦南陔詩以見志一時名人屬而和之人稱南  
陔先生

汪起龍六合庠生崇正丁丑賊破六合起龍負父尋母

遇賊請以身代父命賊憐而釋之

宰應文江寧人幼喪父母哀慕不置刻木肖二親像冬夏更衣衣之晨夕進食出入必虔告有司旌表之

孔瑜字元冑高淳人崇正間諸生居父喪守古禮以母在不敢廬墓遭母喪廬墓三年哀動行路

劉一俊高淳人母卞氏終晝夜悲號廬墓三載有白兔繞其側

汪國淙六合諸生割股愈親居憂後廬墓終身人謂之死孝時畱守右衛方顯割股救親諸生王岳毛至潔許忠三人俱割股療親疾



田木六合人父慎臥病思食鱖魚值皇厰收網不可得  
乃奔至管厰內宦所跪求哀訴其顛末竟獲魚歸父沒  
盡禮邑人稱其孝又有彭章陳鎡沈鎧黃閭四人俱以  
孝聞

曹洵字文澤句容人尚書義之孫早喪父哭甚哀祖母  
夫人四子俱逝謂洵曰待汝長成當爲我服喪三年洵  
曰母爲是言願百歲壽甫成人以大臣裔例入太學明  
經待用因祖母年老告歸侍養和愉承歡克盡孝道鄉  
里推重之時諸生居文明李昌允二人亦以孝行著  
吳方明句容人刺血書法華經千卷爲母祈壽第方魁

割股愈母疾又有徐延雄馬獻圖二人以割股療父被旌

許良春江浦人割股愈父疾貢生周思臯割股愈母疾黃根溧水人割股療父虞欽割股療母貢生傅哀母亡廬墓周家慶養母亦以孝稱

章憲文溧水人父爲南昌通判母早卒事繼母孝又有徐學忠以孝被旌

蔣尚彬字質甫江寧人事繼祖母繼母皆能曲盡孝養鄉黨以爲難

劉應聘高淳人親亡刻木以祀貢生陳宗堯爲新城令

居憂廬墓又有魏滄終身思墓云

王之卿應天人崇正時旌孝

劉夢嵩高淳人父大聘官鹽大使中年解綬隱遯夢嵩遍訪之不得偶過華山有行脚僧語之曰汝父在峩嵎之巔嵩嵩喜赴蜀迎父歸

董宣字繼善江寧人以貢士授青田訓導迎母於官舍晨起課諸生畢卽候於寢門母疾親奉湯藥先嘗之乃進居喪哀毀骨立郡守以下各助資歸葬

季允光六合廩生隨父避兵江南孝養備至父卒扶櫬歸里躬營墓域哀經廬墓積痛不起將革命繪父母小

像以殉

水軍黃阿回割肝愈母被旌上元諸生陳鏞江寧倪壽  
汪元孫江浦楊鳳四人俱以割股旌又李士傑以終身  
茹素爲母祈壽稱孝云

韓范字孟小鷹揚衛籍早慧伯銀臺國藩器之父國楨  
任俠好施有負官錢鬻其女者解囊金償之及范以崇  
正丙子舉於鄉戚屬相慶范獨泣然慟父之不及見也  
居母喪哀痛踰禮服闋謁選得吳興教諭聞國變哭告  
先師廟挈妻孥歸憂憤不食病篤沐浴衣冠北面再拜  
而逝

魏光庭字燦甫高淳諸生父卒於台州官舍奔喪扶櫬歸廬墓六載明鼎革出走閩粵蹈海以死

吳翥南高淳人家勳子時遭鼎革兵驟入門欲刃家勳翥南從樓上望見急下求代被害家勳獲免以土瘞翥南越月始改葬面如生血猶赤妻孫氏誓死守節割股救姑者四遠近悲之

國朝乾隆五年 旌表

國朝路汝捷字多盤江寧人幼孤侍母孝承歡色養母疾輒嚙臂肉以進血流滿地怡如也順治間舉於鄉令浙之新城

徐孝子失其名上元人郡庠生也七歲父爲讐家所殺  
哀號動天欲報之甫弱冠潛鑄匕首長尺許懷之十四  
年子纔七歲持之泣曰汝祖爲人害余蓄恨二十年今  
觀汝可望成立吾將甘心焉卽挾匕首往斬讐頭祭父  
塚詣獄請死士民數百人環庭乞免吏不聽瘦死獄中  
徐陞字征吉上元人幼孤事母劉氏孝嘗侍疾左右就  
養寢食爲癰病篤割股和藥進之病乃已

張樗字端木句容人七歲喪母置書柩前隨讀隨哭父  
見而憐之誓不再娶樗善承顏色孝養五十年父沒居  
喪踰禮

湯學紳溧水人三歲母亾撫於繼母劉氏劉患癰紳吮之繼以嘗糞孝養不異所生劉逝奉後母鄭亦如之父亾廬墓順治十一年以孝旌表

王三接高淳人年十九遊庠母陶氏病故奔喪哀毀廬墓三年

胡彭字四菲高淳人性至孝遇珍果必懷以奉母父病篤長跪祝天衣裾入藥鑪火熾於背乃知之子忽殤戒家人勿哭恐傷父心也居憂廬墓

吳太江浦人家貧爲傭以孝養

邢夢沂字魯生高淳諸生事親定省靡間怒必跪而受

杖家貧典衣奉甘旨愉色勸餐及居憂哀毀盡禮

劉鴻恩字漢遠六合人父久臥病鴻恩年甚穉侍疾數載寐不交睫夜則焚香祈禱願以身代鄉里感歎

郭耀祖字善友上元人痛父病不起籲天請損已壽以益父算若有告之者曰感汝誠孝已讓九齡矣父尋愈耀祖竟先父沒

羅秉侯江寧人母喪廬墓李之曉割肉療親皆以孝行著

王君寵句容人父卒於衡陽旅邸母耿氏聞訃悼痛欲絕君寵長跪泣而請曰兒年十八當捐生往迎父柩第



君修纔三歲耳母獨不念之耶耿爲之節哀君寵遂徒  
跣赴楚自春徂夏扶櫬而回設奠葬於祖塋奉母至孝  
兄弟不異爨者終身

黃士謙字子讓句容人年九歲父客死白下謙偕諸兄  
迎柩回勿不識路踉蹌走家人不知所在聞哭聲尋及  
之見謙科頭跣足仰天而泣曳之歸哭愈痛行路爲之  
心酸年十九母遘疾自知不起遍召戚屬執謙手曰吾  
撫諸孤唯若未娶及吾目中見兒婦可以報若父於地  
下矣咸敬諾婚之夕母勢益危謙哭泣牀下不就寢明  
旦母沒謙哀毀失聲僵臥柩旁足跡不履閭內每祭奠

婦出拜謙泣婦亦泣未嘗通問者三年戚里稱之  
張鏞涇水人母王氏病膈割股和藥進之而愈未幾母  
疾復作鏞廼剜胸取肝投孟中昏仆於地愴恍有老僧  
握其手而言曰汝母當無恙汝事已畢盍行乎越日鏞  
竟死時年二十有一

胡寧字文以六合貢生父光啓負郭課徒家故居城內  
鷄鳴門啓寧必趨省風雨靡間父亾哀毀骨立迨居母  
喪年老矣哭泣如喪父時

路汝捷上元人順治乙酉舉人令新城縣母疾割股愈  
之

宋熊六合人年十二母病割股以進沒後繪像奉之如生同時有割股者九人沈希孟劉國祥余士賓王田陳鼎汪瑛茅如瑄袁志仁顧士倫有割肝療親者一人鄭文元邑人俱稱其孝

趙經遠高淳人事親孝晨起必詣寢門問安否退具衣冠俟親起前趨長揖值令節及遠遊則拜之嘗至蕪湖聞父居旅邸欣然走省肅拜明日又如之至今蕪人猶稱趙孝子云

邢復升字虞聞高淳貢士任繁昌教諭知邛州少喪母事父及繼母盡孝道每朔望率家人羅拜於庭士林稱

之

俞文源字士匯江浦諸生親沒居外庭六載哀痛羸瘠竟以毀卒

鄧林植上元人年十七與弟懋並以負販爲生有孝行母病沒旦夕哭執紼之日血淚並漬見者酸楚植竟毀殞於道及歸懋亦卒

徐鵬字鳴九江寧人康熙癸未進士嘗以親疾通醫理或勸之仕親不樂因絕意仕進色養終身

夏灝齡高淳人父久病灝齡思取心療方剖胷舉家聞灝齡臥所人語涕騰急奔視之灝齡已暈倒於地屋上

塵落厚寸許走告其父父驚躍起病忽愈灝齡亦無恙  
又有夏圯者亦能孝

馮驥字子超上元人居燕子磯畔篤志好學弱冠補弟子員海氛突起祖業略盡色養父母勤劇無所不至及居喪號慟絕而復蘇後以明經貢入成均

劉玉佩江寧人割股療父以孝 旌表

馬國祚字尚卿六合人性至孝母瞽侍養左右三十年康熙癸未西城陷國祚壓焉人謂其死矣及掘之丈餘見國祚猶生衣冠面目無損曳出之徒步抵家觀者驚異以爲孝行之報

孫從龍字際雲六合人康熙庚子武舉仕長淮衛千總  
乞終養於家乾隆辛未歲正月宅有火災逼母汪氏臥  
所門幃已焚汪急不得出從龍冒火奮身奔入翼母負  
之急趨比出戶衣冠鬚髮皆焚火毒中身幾死越數日  
母子得無恙

賈重任字宏仁上元人垂髫失怙比長以祖開國勳應  
得世職有司檄徵至再會母蘇氏病堅辭不赴偕第大  
任侍牀側不寢處者十數年

孫捷字揚章高淳人性純孝童時知定省之節父講學  
里中日昃必躬迎以歸母紡織依燈下讀書與紡織聲

相間也居親喪殆不勝哀三年不進鹽酪晝夜號不絕聲年踰五十舉於鄉

曹宜超字豈凡句容人父病篤輒割股和藥進病卽愈隱而不言母知之讓超超慚悔自此不敢復損髮膚矣比父母亡喪葬如禮

張滋字挹清六合諸生雍正四年邑內大疫母厲氏病危割股愈之鄉黨稱嘆又有任鏡侍母疾浣衣滌器十餘年以孝著

劉開楠字王文高淳人幼喪父事母務得歡心母尋又亡居憂哀慟苦寢墓下三年始歸月朝十五詣墓哭拜

者莫不酸感開楠思親不置迫切遺像事之如生  
高官廕上元人性篤孝四歲父病痢不食蔭亦不食母  
病危藥不下咽蔭以口度藥夜則額天請代割股進之  
母愈蔭遂以創發卒時年十六其後十八年母年七十  
七乃卒雍正十年旌表

易芳字天培上元人家貧以繪事爲業事母孝有所欲  
必竭力致之以博歡母性嚴急有不當意輒怒加以鞭  
撻長跪受之愉色慰解乃已家無宿儲必具旨以奉母  
已則有米食粥無米食菜而已年六十餘竟以貧死時  
母年逾九十氣將絕猶顧母而流涕者三



趙開來字明初句容人三歲喪父母家貧力弱無以營  
葬遲之二十年始獲親於枯蕩山廬墓三年晝夜號哭  
常食麥屑不噉鹽酢夜猛獸來望之有聲狀若歎息者  
李之實字仲節六合人侍郎敬之子順治己亥夏值寇  
亂負祖母曹氏扶母張氏逃山中夜行四十里以任重  
嘔血死又有汪生民字寅公割股療父遭亂兵至負母  
倪氏逃匿深山嘔血死

謹璋字玉章家金陵性醇厚事親以孝聞母病與妻閔  
氏侍榻前不解帶者數月居喪如禮服闋游成均以學  
行自勵

朱之卿字盡甫上元人仕池浦營守備隨提督杜宏域  
勦流寇得功乞歸終養子浦澄性亦孝

張岍然字節侯上元人父延祚仕寶慶通判乞歸不仕  
岍然未成童而父沒母施氏年二十七矢志撫孤家貧  
紡績難以自給岍然棄儒貿易委婉承志晨昏視膳者  
六十餘年母沒哀毀骨立鄉里稱之

李西岡上元人少喪母父娶繼母未旬日而父沒繼母  
號慟欲以身殉西岡泣而請曰脫有不諱誰撫孤耶母  
亦無詞以告吾父也繼母爲之節哀西岡曲盡孝道三  
十年如一日

朱文謙新安文公裔徙居江寧已三世矣文謙少孤偕兄文泰事母范以孝聞

方力新字曰盤上元人母亾號慟幾絕竭力以營葬廬於基側臥苫枕塊朝夕哭拜竟成羸疾自知不起尋以罔極未報哀泣墓前疾亦漸瘳聞者異之

劉公良上元人父客於鎮江遭劫死公良家居心悸奔訊知父死於河控於有司抵諸兇於法負屍歸葬

厲兆裔字爾嗣六合人嗣伯父奇生嗣母汪氏御之嚴汪疾篤兆裔夜禱北辰割股進藥病遂痊自是慈孝有加

鄭士貴字鴻儒上元人家道中落遠貿粵西獲息以歸  
與弟士祿孝養父母子統善承父志邑中陳颺劉芳蔭  
蔡殿先俱以孝聞

張超特字滌田上元貢生性至孝任鑾儀衛經歷乞歸  
終養母亾哀毀骨立廬墓三年

張光容字君華句容人親有疾割股居喪廬墓

錢士揚江寧人七歲母病臥樓下火起士揚聞之自塾  
奔歸抱母號哭火遂息母沒廬墓三年有白鳥結巢之  
異

程煒字闇章上元人性誠樸早喪偶不再娶侍父寢三

十年親滌溺器褰衣垢必親浣父年九十歿煒老矣猶孺子泣云

謝之庶湫水人乾隆二年邑舉孝子請旌

吳學菜字班甫高淳諸生母亾廬墓三年邑令崔掄奇上其事乾隆四年旌表

吳運鎮學菜子性至孝童時知色養年十七父亾哀毀如禮事母邢氏益謹嘗侍疾嘗湯藥廢寢食母愈而後安比居憂廬於墓側泣血三年時有白鳥翔集輒作哀鳴相向人以爲孝感云乾隆五年旌表今父子同一坊

普宏烈字奉寰上元人親疾常割兩臂肉和藥以進病獲痊邑中又有割股者五人監生陳昌熾及姪陳相呂璉汪應乾張翼

郁瑞字典六江寧人已丑進士充纂修官授中書舍人幼時侍母疾割股以進屢愈遂以孝聞邑中復有割股者四人授職州佐周佳賓貢士談仕麐陳玉裁潘懋佳周良遇高淳人少喪父事母盡孝母病且篤良遇涕泣嘗糞居憂號慟廬墓三年鄉里稱之乾隆十四年被旌

任師琦溧水人髫年母疾割股愈之又有謝應綱張問

道謝世昞胡志龍王立基陳心子劉正暹劉之亨陳治  
楷九人俱割股療母芮大望胡順日二人割股療父張  
嘉貞陳子有陳運升吳本仁四人割股療從父居喪廬  
墓者錢文象戴得道章楫張元采四人

路問衢高淳人以孝聞父歿廬墓三年未歸也母又歿  
復廬墓三年至是居墓旁六年矣又遲之二年乃歸邑  
中居喪廬墓六年者梅友聲朱應道二人廬墓三年者  
何繼祚徐紳陳大年卞英謝正謨五人至張時賁哭墓  
三年不避寒暑尤推至性過人云

吳允茂高淳人孝子運鎮族人也父兄相繼臥病允茂

遞割股以進運鎮心善之及允茂疾子康寧亦再爲割  
股父子濟美鄉黨稱善復有楊士堡與允茂父子相類  
爲父割股者劉道吉周斯明劉自懿葛自新葛時順五  
人爲母割股者傅成瑤李上倫葛自深三人唯成瑤盛  
夏不解衣終身秘其事

顧彝字子常江浦人家貧色養與毛華廷趙應斗二人  
俱以孝聞又有普烈割股療父及母

王以綱高淳人家貧傭力以養母病痿癱晨起具食就  
臥榻奉母侍食畢衣之起始赴傭日中如之日昃又如  
之主人散夫價廉取其值後至先罷率以爲常夜爲母



新修江寧縣志 卷之三十五  
三  
滌溺器浣裹衣者十有六年

吳天明江寧人父病已篤披髮泣禱神前願以已算益父俄而失明死父疾遂痊邑中稱苦孝

李況字同人上元人親歿日夜號泣終喪鹽酢不入口易名曰蒿字匪莪示孺慕焉

朱天祿字公受六合人割股愈母母亾三事繼母如所生父卒厚撫諸弟

唐仲熊字虞臣江寧諸生父早喪事母孝母歿啜粥三年不入私室旣葬每朔望必詣墓田展拜卒無子士林哀之邑人周鶴齡天性至孝妻馬氏亦能承志

陳崙字芳樹高淳諸生母病割股以進歿後致哀盡禮服闋後口不嘗鹽菜者跨積寒暑每見股創瘡思親不置涔涔涕下云

胡蒼元句容縣之書吏父亾事母孝母歿葬於南郊白陽門距城二里蒼元必晨夕詣墓所瞻拜如是者三十年

王可文溧水諸生楊自秀僕也母任氏疾篤可文剖胷挖心授姊煎劑以進母子竟獲全邑令嘉之上其事於大府尋奉檄令伊主與其妻一併放贖侍母給匾以獎楊志管溧水人少孤事母至孝嘗侍疾割股愈母者再

母卒廬墓三年嘉慶四年請旌

金大成上元人國子生襁褓失怙年五歲忽向母詰父所在母實告之號哭不已每祭涕泣數日不能下咽母病額天祈禱願減己算以益母迨居喪悲慟絕而復蘇營葬之夕露宿草間廬墓再期而歿

端木心寅上元人幼孤育於母氏比長蒞直隸文安縣主簿侍母疾割臂進之不効居喪盡禮爲吏時布衣蔬食分廉俸之半以濟族之孀居者曰吾曷敢忘吾母耶歿後貧不能歸葬文安士民送其喪歸

方盤字力新上元人母死廬墓六年哀毀成疾而殞

焦以衍字祈恒上元人國子生性至孝庭幃色養食必視膳寢必問安侍母疾數月不解帶醫藥罔効以衍籲天默禱割股和羹進母病尋愈

單理字首文江寧人三歲失怙母教之讀書炎夏爆書園中見父手迹啼泣不止母病躬侍湯藥六十年比居喪廬墓三載

張銓字學修江寧人十餘齡割股療親疾居喪廬墓茹素終身

張大韶字廣虞江寧人國子生年十三父病篤醫藥罔効割股煎湯進之立愈乾隆己丑繼母駱氏疾恍惚見

四僧募緣夢醒而語大韶未之悟也偶適城西清涼山見地藏殿被焚大韶罄家財以輸之殿宇落成母病亦愈

張世琛江寧人有孝行乾隆戊申母患癰疽危在朝夕世琛潛懷刃割左臂和藥進之母尋愈獲以壽考終世琛哀毀死

劉毓桂字文舟江寧人襁褓時父清遊幕京師旋歷諸省久之而家信乏絕毓桂既長迫欲見父辭母踪跡之跋涉三年間父在重慶府署星夜赴之父子始得相見畱署半載奉父東還娶婦生孫庭幃色養者八年父以

壽考終於家

顧彩臣江寧人母疾篤割左膀煎湯以進不効復割右股其繼妻王氏亦割左臂和藥進之卽愈

徐炳南江寧人年十四父疾亟齋戒沐浴虔禱於神願以身代遂割股和藥進之甫就寢若有神告曰念爾孝行延汝父壽三年越日疾漸痊子長椿邑庠生

郭鴻江寧府庠生家貧事父種玉以孝著居喪哀毀事母益謹嘗侍疾瀕危者數矣鴻日夜籲天默禱願減己算益母壽逾年母竟瘳嘉慶十年旌

丁夢橙江寧庠生有孝行年甫弱冠母病危篤目不交

健衣不解帶者二年居喪哀毀逾禮父春秋高晨夕承歡必得甘脆以進父年八十六無疾而終夢橙泣血悲號兩目盡腫貧破產營葬葬後朔望詣父墓展拜往返八十餘里年七十餘春秋祭掃徒步如常鄉里稱之徐夢南江寧人年十四父病篤醫罕驗虔禱於神割股以進夜臥若有神告曰爾父壽已盡念爾誠孝加三歲矣翌日父病痊如期而卒後事孀母二十餘年孺慕之忱如一日

高爲桂句容人父早世事母能得歡心母背生癰痛不能忍爲桂焚香向北辰稽顙泣禱求以身代醫云臙首

不出終難收口爲桂跪床以口極力吮吸滿口膿血腥穢母病遂痊

職員朱本謙六合人善事父母父年甫五十本謙乞勿復遠遊日延父執二三人聚飲花間以破父之岑寂至老不倦是以父母俱年過九旬方逝

孫誠溧水人性至孝八歲喪父哀毀如成人祖母周氏母陶氏共撫之祖母疾割股療之比母病復割股以進竟不起躬自負土成塋廬墓三載山有猛虎夜環其廬而臥見人則避道而去鄉里以爲孝感云

監生邢本姬李以綱俱高淳人以孝聞



吳嘉域新安人占籍高淳有孝行侍母疾衣不解帶踰年晨夕泣禱於大士夜夢大士謂之曰汝母憂母疾當愈且益算後悉符所夢比居喪三年不釋服竭力營葬竟以思慕哀戚而殞

魏大琨高淳人母疾篤割股和藥進之而愈越十二年母又疾大琨之兄大珂亦割股以療之

鍾弼清字右良六合人有孝行父病割股愈之越數年父復病弼清再割股以進竟不起比居憂哀毀骨立幾不欲生是年冬母趙氏病割股和藥進之而愈會伯兄長清歿嫂趙氏矢志守節其母誘之歸寧欲奪其志弼

清往探之嫂灑淚欲回而不得弼清知不可以口舌爭  
急訴諸邑令令周知其情使趙母送其女回且謂弼清  
曰汝欲全嫂之清節固佳但我聞汝割股者三孝行尤  
可嘉也曰此實愚民因親病劇計無復之耳令益重之  
年五十四終諄諄以不獲終養母氏爲憾戚屬無不歎  
息

捐職從九厲濯六合人乾隆乙巳父癯怯疾氣虛中滿  
醫生束手濯憂形於色齋戒沐浴夜禱於天割股和藥  
進之父病漸瘳

貢生唐淦六合人十歲失怙母數日不食亦不食朝夕

追隨唯謹乾隆丁酉母病篤割股進之卽愈孝養承歡者終身凡割股者四

樂寬鎮六合人幼失怙母李氏撫之成立乾隆丙戌母病危篤寬鎮焚香割股進之逾日病良已

庠生魏國安六合人割股愈母邑中顧文奎割股愈父汪嘉勳六合人早喪母父教之讀過目成誦比長教授鄉里父患病二十餘年藥物戡効乾隆庚子病勢危篤嘉勳頓天默禱割股入藥煎之遠近皆藥香鄰里嘆異其父服之越日而愈

朱鷺六合人附貢生本福子父病親嘗湯藥蹠蹠牀前

閱四年如一日父卒哀毀幾至滅性里戚共稱其孝乾隆五十七年修葺學宮舊制文運坊兩旁樹柵欄別內外上無簷廡不蔽風雨驚請邑令易以花牆捐貲完築至今如新子五人長方江南丁卯科舉人次京次襄邑庠生